

禮拜六日早十點鐘聚集唱頌主詩六首石宅喁祈禱至十點三刻郭牧士考問胡石二人天道溯原後從十點三刻至十二點半赫牧士考問胡石二人天文淺說及偉師列聖經撮要論後唱讚美一百首畢禮拜日十點鐘公集屬禮拜師牧士主理唱頌主詩一百五十四首石宅喁祈禱讀使徒行傳十七章又唱詩一百六十六首各教友所抒已見備言開導勉勵安慰之言後又唱詩一百六十九首後正禮拜海牧士主理唱詩一百七十五首祈禱後讀馬太福音書二十八章又唱詩一百六十九首宣講十八十九節又唱詩一百七十一首祝福畢下午三點鐘赫牧士主理唱頌主詩二十六首祈禱讀約翰福音書十七章又唱詩二十九首施行洗禮讀領洗文祈禱文施洗蔣姓婦人一名又施行鄭姓女小孩一名後又分行聖餐讀領聖餐文并祈禱文又唱頌主詩二十七首祝福畢禮拜一日公議教會各人所司之職

各國近事

大清 開平礦務近聞

招商局總辦唐景星觀察奉 李伯相札委督辦開礦事宜已於八月初八日在津開局曾列前報茲由津南還者言唐觀察查辦開平礦務於生鐵一欸極爲注意緣中國所用生鐵本屬無多即各省製造局及城鄉各鐵匠莫不需用熟鐵如購鎔生鐵爐兩副每月可出生鐵六百墩熟鐵爐廿副每月可化熟鐵一百萬斤共約需銀二十萬兩水脚保險均在其內大約運至開平及建造鐵廠煤爐住房共需銀三十萬兩每年可出熟鐵十二萬担按照中國時價值銀二十六萬兩另生鐵七千二百墩按時價值銀十四萬兩合共得值四十萬兩除工本銀十八萬兩及中外鐵匠並司事人等辛工飯食銀五萬兩又除關稅三萬兩裝卸水脚上下工力及棧租銀四萬兩共計需銀三十萬兩歲可溢銀十萬兩查開煤機器木椿及建造煤棧雇用洋人置辦物料共約需銀十萬兩惟開煤必先築鐵路而築路必須掘鐵煤與鐵相爲表裡自應一體開辦計購開煤棧器等銀

四十萬兩及築鐵路銀四十萬兩共銀八十萬兩爲數頗巨恐非易籌如能先籌銀三十萬兩購置機器遞年籌銀三十萬兩以爲買地築路採煤鑄鐵等項之需便可敷衍鐵路築成之次年即可得鐵路利銀十九萬兩煤利七萬五千兩鐵利十萬兩然則兩年中儘可歸本以後每年入息共有三十餘萬爲利豈不溥哉第以費本甚巨不得不慎重其事故 唐觀察擬先將鐵樣附寄外國鑄化如得四五成之間然後定購機器又俟外國化鐵成色回音如何或由官辦或招商辦或專辦化鐵機器再行稟請 李伯相憲裁觀於此則 唐觀察於各庶務無不胸有成竹實時局中未可多得之員無怪上游器重倚任綦專矣

臺灣捷報誌畧

臺灣生番前有死灰復燃之事經 閩省大吏派兵入山搜剿勝負不一屢經列報茲接福州來信得悉官軍之剿捕生番者大獲全勝擒斬番逆無算餘黨皆畏罪投誠不敢再作南人之反而各軍亦將整隊凱旋云

粵西亂耗譯錄

傳聞廣西省城有兵變之云係某叅戎所督帶者爲數不下四五萬人粵西人民深恐其竄入境內均存戒心等語此信得諸香港日報是否的確容再譯登

申禁攙用砂錢示

鹽運使銜陞用道署蘇州府正堂錢

爲

再行出示嚴禁事照得私鑄小錢及收買攙和行使罪有專條大于例禁歷經前府暨本署府親自查察訪拿示禁并傳集各城門內外錢業面諭取結在案茲本署府訪聞市上各舖仍有攙搭砂廣私鑄小錢并尅扣底串情弊實屬故違禁令除嚴密查拿外合再出示諭禁爲此示仰各錢舖暨諸色人等知悉嗣後各錢舖收兌銀洋務須兌付通足制錢不准任意攙和尅扣倘敢不遵一經訪確或被告發定將該舖封閉差提究辦其各色店舖買賣亦一律行用制錢如有棍徒逞強挾用小錢許各該店鳴保送官究治如有老例該店舖各物定例減折者照前項行事不得從中取巧未禁之前定章八折九折禁止之後改爲不折不扣有該保徇隱提案重懲不貸各宜凜遵毋違特示切切